


西漢會要
八





西漢會要

(八)

徐天麟撰

西漢會要卷三十四

宋徐天麟撰

職官四

封建

封功臣

漢興自秦二世元年之秋。楚陳之歲。初以沛公總帥雄俊。三年。然後西滅秦。立漢王之號。五年。東克項羽。卽皇帝位。八載而天下乃平。始論功而定封。訖十二年。侯者百四十有三人。時大城名都。民人散亡。戶口可得而數。裁什二三。是以大侯不過萬家。小者五六百戶。封爵之誓曰。使黃河如帶。泰山若厲。國以永存。爰及苗裔。於是申以丹書之信。重以白馬之盟。又作十八侯之位次。孟康曰。唯作元功蕭曹等十八人位次耳。高后乃詔作位次下竟師古曰。謂蕭何。曹參。張敖。周勃。樊噲。酈商。奚涓。夏侯嬰。灌嬰。傅寬。斬高后二年。復詔丞相陳平。盡差列侯之功。錄飲王陵。陳武。王恢。薛歐。周昌。丁復。蟲達。從第一至十八也。第下竟藏諸宗廟。副在有司。始未嘗不欲固根本。而枝葉稍落也。逮文景四五世間。流民旣歸。戶口亦息。列侯大者至三四萬戶。小國自倍。富厚如之。子孫驕逸。亡其先祖之艱難。多陷法禁。隕命亡國。或云子孫

訖於孝武後元之年。靡有子遺。耗矣。罔亦少密焉。故孝宣皇帝愍而錄之。乃開廟藏。覽舊籍。詔令有司求其子孫。咸出庸保之中。並受復除。或加以金帛。用章中興之德。降及孝成。復加卹問。稍益衰微。不絕如綫。善乎杜業之納說也。曰。昔唐以萬國致時雍之政。虞夏以之多羣后。饗共己之治。湯法三聖。殷氏太平。周封八百。重譯來賀。是以內恕之君。樂繼絕世。隆名之主。安立亡國。至於不及下車。德念深矣。成王察牧野之克。顧羣后之勤。知其恩結於民心。功光于王府也。故追述先父之志。錄遺老之策。高其位。大其寓。愛敬飭盡。命賜備厚。大孝之隆。於是爲至。至其沒也。世主歎其功。無民而不思。所息之樹。且猶不伐。況其廟乎。是以燕齊之祀。與周並傳。子繼弟及。歷載不墮。豈無刑辟。繇祖之竭力。故支庶賴焉。迹漢功臣。亦皆割符世爵。受山河之誓。存以著其號。亡以顯其魂。賞亦不細矣。百餘年間。而襲封者盡。或絕失姓。或乏無主。朽骨孤於墓。苗裔流於道。生爲愍隸。死爲轉屍。以往況今。甚可悲傷。聖朝憐閔。詔求其後。四方忻忻。靡不歸心。出入數年。而不省察。恐議者不思大義。設言虛亡。則厚德掩息。遊東布章。非所以視化勸後也。三人爲衆。雖難盡繼。宜從尤功。於是成帝復紹蕭何。哀平之世。增修曹參。周勃之屬。得其宜矣。以綴續前記。究其本末。并序位次。盡于孝文。以昭元功之侯籍。功臣表

高帝與功臣剖符作誓。丹書鐵契。金匱石室。藏之宗廟。列侯畢已受封。奏位次。皆曰。平陽侯曹參功最多。宜第一。然上心欲何爲第一。鄂千秋曰。蕭何當第一。參次之。上乃令何第一。蕭何傳

十二年詔曰。吾立爲天子。帝有天下。十二年于今矣。與天下之豪士共定天下。同安輯之。其有功者上致之王。次爲列侯。下乃食邑。而重臣之親。或爲列侯。皆令自致吏。得賦斂。女子公主。爲列侯食邑者。皆佩之印。賜大第室。吏二千石徙之長安。受小第室。入蜀漢定三秦者。皆世世復。吾于天下功臣。可謂亡負矣。云。

本紀

高后二年。詔曰。高皇帝匡飭天下。諸有功者。皆受分地爲列侯。朕思念至于久遠。而功名不著。亡以尊大。誼施後世。今欲差次列侯功。以定朝位。藏于高廟。世世勿絕。嗣子各襲其功位。其與列侯議定奏之。丞相臣平言。謹與絳侯臣勃。曲周侯臣商。潁陰侯臣嬰。安國侯臣陵等議。列侯幸得賜餐錢奉邑。陛下加惠以功。次定朝位。臣請藏高廟。奏可。

本紀

封外戚

高后欲立諸呂爲王。問王陵。陵曰。高皇帝刑白馬而盟。曰。非劉氏而王者。天下共擊之。今王呂氏。非約也。太后不說。問左丞相平。及絳侯周勃等。皆曰。高帝定天下。王子弟。今太后稱制。欲王昆弟。諸呂無所不可。太后喜。罷朝。陵責平勃曰。始與高帝啞血而盟。諸君不在邪。今高帝崩。太后女主。欲王呂氏。諸君縱欲阿意背約。何面目見高帝于地下乎。平曰。于面折廷爭。臣不如君。全社稷安劉氏後。君亦不如臣。陵無以應之。

王陵傳

周亞夫爲丞相。竇太后曰：「皇后兄王信可侯也。」上曰：「始南皮及章武先帝不侯。」師古曰：南皮竇彭祖太后弟廣。及臣卽位，乃侯之。信未得封也。竇太后曰：「人生各以時行耳。竇長君在時不得侯，死後乃其子彭祖。」

顧得侯，吾甚恨之。帝趣侯信也。上曰：「請得與丞相計之。」亞夫曰：「高帝約非劉氏不得王，非有功不得侯。不如約天下共擊之。今信雖皇后兄，無功侯之，非約也。」上默然而沮。周亞夫傳。

漢興，外戚與定天下侯者二人，故誓曰：「非劉氏不王。若有亡功非上所置而侯者，天下共誅之。」是以高后

欲王諸呂，王陵廷爭。孝景將侯王氏，修侯犯色，卒用廢黜。是後薄昭竇嬰上官衛霍之侯，以功受爵，其餘

后父據春秋褒紀之義，帝舅緣大雅申伯之意，寢廣博矣。外戚恩澤表。

成帝河平二年六月，悉封諸舅。王譚爲平阿侯，商爲成都侯，立爲紅陽侯。逢時爲高平侯，五人同日封。故

世謂之五侯。太后母李氏更嫁爲河內苟賓妻，生子參。太后欲田蚡爲比而封之。上曰：「封田氏非正也。」以

參爲侍中、水衡都尉。元后傳。

哀帝欲封祖母傅太后從弟商。鄭崇諫曰：「孝成皇帝封親舅五侯，天爲赤黃，晝皆日中有黑氣。今祖母從昆弟二人已侯，孔鄉侯、皇后父高武侯，以三公封，尙有因緣。今無故欲復封商，壞亂制度，逆天人心，非傳氏之福也。」臣聞師曰：「逆陽者厥極弱，逆陰者厥極凶短折。」犯人者有亂亡之患，犯神者有疾天之禍。故周公著戒曰：「惟王不知艱難，唯耽樂是從，時亦罔有克壽。」故衰世之君，夭折蚤沒，此皆犯陰之害也。臣願以

身命當國咎崇。因持詔書案起。傳太后大怒曰。何有爲天子乃反爲一臣所顓制邪。上遂下詔曰。朕幼而孤。皇太后躬自養育。免于襁褓。教道以禮。至于成人。惠澤茂焉。欲報之德。皞天罔極。前追號皇太后父爲崇祖侯。惟念德報未殊。朕甚惡焉。侍中光祿大夫商。皇太后父同產子。小自保大。恩義最親。其封商爲汝昌侯。爲崇祖侯後。更號崇祖侯爲汝昌哀侯。鄭崇傳

封丞相

元朔中。公孫宏代薛澤爲丞相。先是漢常以列侯爲丞相。唯宏無爵。上于是下詔曰。朕嘉先聖之道。開廣門路。宣招四方之士。蓋古者任賢而序位。量能以授官。勞大者厥祿厚。德盛者獲爵尊。故武功以顯重。而文德以行褒。其以高成之平津鄉戶六百五十封丞相宏爲平津侯。其後以爲故事。至丞相封。自宏始也。本傳

孝武元功宿將略盡。會上亦興文學。進拔幽隱。公孫宏自海瀕而登宰相。於是寵以列侯之爵。自是之後。宰相畢侯矣。恩澤侯表

朱博爲丞相。封陽鄉侯。食邑二千戶。上書曰。故事。封丞相不滿千戶。而臣過制。願還千戶。本傳

平當爲御史大夫。至丞相。以冬月賜爵關內侯。本傳漢儀注。御史大夫爲丞相更。春乃封。李奇曰。以冬月非封侯時。

遣列侯就國

文帝二年十月詔曰朕聞古者諸侯建國千餘各守其地以時入貢民不勞苦上下驩欣靡有違德今列侯多居長安邑遠吏卒給輸費苦而列侯亦無繇教訓其民其令列侯之國爲吏及詔所止者遣太子紀本

下同

三年十一月詔曰前日詔遣列侯之國辭未行丞相朕之所重其爲朕率列侯之國遂免丞相勃遣就國
景帝二年十月省徹侯之國晉灼曰文帝遣列侯之國今省之

繼絕世

高帝五年下令曰楚地已定義帝亡後欲存恤楚衆以定其主齊王信習楚風俗更立爲楚王本紀

孝文元年更封蕭延爲鄼侯功臣表

孝景二年封故相國蕭何孫係爲列侯

中元元年封故御史大夫周苛周昌孫子爲列侯

孝武元光三年封高祖功臣五人後爲列侯

元狩三年封故相國蕭何曾孫慶爲列侯

孝宣地節二年詔大司馬大將軍博陸侯功德茂盛朕甚嘉之復其後世疇其爵邑世世毋有所與功如

蕭相國

地節四年封故鄼侯蕭何曾孫建世爲侯。

元康元年復高皇帝功臣絳侯周勃等百三十六人家子孫令奉祭祀世世勿絕其毋嗣者復其次。並本紀

功臣子孫訖于孝武後元之年靡有子遺耗矣故孝宣皇帝愍而錄之乃開廟藏覽舊籍詔令有司求其

子孫咸出庸保之中並受復除或加以金帛用章中興之德降及孝成復加卹問稍益衰微不絕如絳杜

業納說曰內恕之君樂繼絕世隆名之主安立亡國迹漢功臣亦皆割符世爵受山河之誓存以著其號

亡以顯其魂賞亦不細矣百餘年間而襲封者盡或絕失姓或乏無主朽骨孤於墓苗裔流於道生爲慙

隸死爲轉屍以往況今甚可悲傷聖朝憐憫詔求其後四方忻忻靡不歸心出入數年而不省察恐議者

不思大義設言虛亡則厚德掩息遴柬布章非所以視化勸後也三人爲衆雖難盡繼宜從尤功于是成

帝復紹蕭何哀平之世增修曹參周勃之屬得其宜矣。功臣表

元康四年賜故右扶風尹翁歸子黃金百斤以奉其祭祀又賜功臣適後黃金人二十斤。本紀

成帝元延元年封蕭相國後喜爲鄼侯。本紀

孝平元始二年封故大司馬博陸侯霍光從父昆弟曾孫陽宣平侯張敖元孫慶忌周勃元孫共。按本傳乃元孫

之子舞陽侯樊噲元孫之子章皆爲列侯復爵賜故曲周侯酈商等後元孫酈朋友等百一十三人爵關

內侯食邑各有差。本紀

元始中太皇太后詔賜公孫宏後子孫之次當爲後者爵關內侯徵詣公車上名尙書朕親臨拜焉史記公孫宏傳

王四夷君長

高帝五年詔曰故粵王亡諸世奉粵祀秦侵奪其地使其社稷不得血食諸侯伐秦亡諸身帥閩中兵以佐滅秦項羽廢而弗立今以爲閩粵王王閩中地勿使失職本紀

十一年五月詔曰粵人之俗好相攻擊前時秦徙中縣之民南方三郡使與百粵雜處會天下誅秦南海尉它居南方長治之甚有文理中縣人以故不耗滅粵人相攻擊之俗益止俱賴其力今立它爲南粵王使陸賈卽授璽綬它稽首稱臣本紀

十二年詔曰南武侯織亦粵之世也立以爲南海王本紀

孝惠三年舉高帝時粵功曰閩君搖功多其民便附乃立搖爲東海王都東甌世號曰東甌王閩粵傳

武帝建元四年南粵王胡遣太子嬰齊入宿衛元鼎四年上書請比內諸侯三歲一朝除邊關於是天子許之賜其丞相呂嘉銀印及中尉太傅印餘得自置本傳

建元六年閩粵王郢攻南粵粵人殺郢降天子曰郢等首惡獨無諸孫繇君丑不與謀乃使郎中將立丑爲粵繇王奉閩粵祭祀本傳

孝昭始元六年。詔曰。鉤町侯毋波。率其君長人民。擊反者。斬首捕虜有功。其立毋波爲鉤町王。本紀

匈奴故印文曰。匈奴單于璽。本傳王莽更曰新匈奴單于章。

西南夷君長以百入。越本作數。謝本作入。獨夜郎滇受王印。本傳。

傅介子斬樓蘭王。馳傳詣闕。乃立王弟尉屠耆爲王。更名其國爲鄯善。爲刻印章。賜以宮女爲夫人。西域傳。

關都尉文忠攻罽賓。殺其王。立陰未赴爲罽賓王。同上。

西域凡國五十。自譯長城長君。監吏。大祿。百長。千長。都尉。且渠。當戶。將相至侯王。皆佩漢印綬。凡三百七

十六人。本傳。

侯降虜

昔書稱蠻夷帥服。詩云。徐方旣徠。春秋列潞子之爵。許其慕諸夏也。漢興。至于孝文時。乃有弓高襄城之封。雖自外徠。本功臣後。故至孝景始欲侯降者。丞相周亞夫守約而爭。帝黜其議。初開封賞之科。功臣表下。匈奴王徐盧等五人降漢。師古曰。功臣表曰。唯徐盧。上欲侯之以勸後。亞夫曰。彼背其主降陛下。陛下侯之。卽何以責人臣不守節者乎。上曰。丞相議不可用。乃悉封徐盧等爲列侯。周亞夫傳。

封方士

藥大見武帝。言黃金可成。而河決可塞。不死之藥可得。僊人可致也。上乃拜大爲五利將軍。居月餘。得四

印得天士將軍。地士將軍。大通將軍。詔以二千戶封地士將軍大爲樂通侯。賜列侯甲第。郊祀。

婦人爵邑

高帝封兄伯妻爲陰安侯。文紀蘇林曰高帝兄伯妻龔頤侯母邱嫂也。

高后二年封蕭何夫人爲鄼侯。蕭何傳。

樊噲妻呂須爲臨光侯。樊噲傳。

列侯太夫人夫人。文紀七年如淳曰列侯之妻稱夫人。列侯死子復爲列侯乃稱太夫人。子不爲列侯不得稱也。

孝文十二年賜諸侯王女邑各二千戶。本紀。

武帝尊王皇后母臧兒爲平原君。外戚傳。

王皇后前夫金氏女封修成君。賜湯沐邑。同上。

宣帝地節四年賜外祖母號爲博平君。以博平蠡吾兩縣戶萬一千爲湯沐邑。王夫傳。

金當上南大行爲太夫人。金日磾傳文穎曰南當母名也。上名狀于大行。

王莽母賜號曰功顯君。王莽傳。

平帝賜三妹謁臣號修義君。哉皮爲承禮君。鬲子爲尊德君。食邑各二千戶。衛姬傳按本紀云賜帝三妹。

與紀不同當考。

王莽自尊太后姊妹君俠爲廣恩君。君力爲廣惠君。君弟爲廣施君。皆食湯沐邑。元后傳

封建雜錄

列侯所食縣曰國。百官表

高帝十二年詔列侯皆令自致吏。得賦斂女子公主爲列侯食邑者。佩之印。賜大第室。本紀

列侯賜餐錢奉邑。呂后紀。應劭曰。諸侯四時皆得賜餐錢。

秦漢之制。列侯封君食租稅。歲率戶二百。千戶之君則二十萬。朝覲聘享出其中。貨殖傳

孝武元鼎五年九月。列侯坐獻黃金酎祭宗廟不如法。奪爵者百六人。本紀。漢儀注云。諸侯歲以戶口酎黃金於高廟。

孝宣地節四年。襄隄侯聖坐酎金斤八兩少四兩免。

五鳳四年。朝節侯固城坐酎金少四兩免。楊邱侯偃坐出國界。削爲司寇。列侯坐罪奪爵者多矣。略舉數條以爲例。以上並見王子侯表。

終陵侯華祿坐出界耐爲司寇。功臣表

祚陽侯仁坐擅興繇賦。削爵一級。此類甚多。皆不具載。

孝景中二年。令列侯初封及之國。大鴻臚奏策。列侯薨葬。國得發民輓喪穿復土治墳。無過三百人畢事。

本紀

西漢會要卷三十五

宋徐天麟撰

職官五

加官

侍中左右曹諸吏散騎中常侍皆加官所加或列侯將軍卿大夫將都尉尚書太醫太官令至郎中亡員多至數十人侍中中常侍得入禁中諸曹受尚書事諸吏得舉法散騎騎並乘輿車給事中亦加官所加或大夫博士議郎掌顧問應對位次中常侍中黃門有給事黃門位從將大夫皆秦制百官表

西域都護加官

見三十二卷西域都護條

爵

爵一級曰公士二上造三簪袅四不更五大夫六官大夫七公大夫八公乘九五大夫十左庶長十一右庶長十二左更十三中更十四右更十五少上造十六大上造十七駟車庶長十八大庶長十九關內侯二十徹侯皆秦制以賞功勞徹侯金印紫綬避武帝諱曰通侯或曰列侯改所食國令長名相又有家丞

門大夫庶子。百官表。

高帝五年詔曰。軍吏卒會赦。其七大夫以上。師古曰。七大夫也。皆令食邑。非七大夫以下。皆復其身及戶勿事。

本紀下。

又曰。七大夫公乘以上。皆高爵也。爵或人君上所尊禮。異日秦民爵公大夫以上。令丞與亢禮。今吾於爵非輕也。且法以有功勞行田宅。其令諸吏善遇高爵。稱吾意。且廉問有不如吾詔者。以重論之。

八年。令爵非公乘以上。毋得冠劉氏冠。

孝惠卽位。爵五大夫以上有罪當盜械者。皆頌繫。上造以上當刑及當爲城旦舂者。皆耐爲鬼薪白粲。

武帝時。民多買復及五大夫千夫。於是除千夫五大夫爲吏。食貨志。

舊爵。

上聞。古爵。呂氏春秋曰。天子賞魏文侯以上聞。晉灼曰。名通於天子也。

樊噲自公大夫賜上聞爵。本傳。

執帛。鄭氏曰。楚爵也。張晏曰。孤卿也。

曹參自五大夫封執帛。號建成君。本傳。

夏侯嬰賜爵七大夫。賜爵五大夫。賜爵執帛。本傳。

執珪。如淳曰：呂氏春秋得伍員者，位執珪。古爵名也。張晏曰：侯伯執珪，以朝。位比之。

夏侯嬰賜爵執帛，賜爵執珪，賜爵封。本傳。

曹參封執帛，遷爲執珪，封建成侯。本傳。

卿。

樊噲賜爵五大夫，賜爵卿。本傳。

傅寬賜爵卿。本傳。

封君。賜重封。

叔孫通號稷嗣君。本傳。下同。

婁敬號曰奉春君。

侯公平國君。高紀。

曹參自五大夫封執帛，號建成君。本傳。下同。

樊噲賜爵封，號賢成君，破南陽，賜重封。

傅寬賜爵卿封，號共德君。

孔霸以帝師賜爵，號褒成君。孔光傳。